

المكان جَوَّاءَ مُحَاصِرَ  
محمد حسني إبراهيم

المكان جواك محاصر / شعر

محمد حسني إبراهيم

الطبعة الأولى ، ٢٠٠٨

جميع الحقوق محفوظة



دار اكتب للنشر والتوزيع

القاهرة ، ١ ش المعهد الديني ، المرج

هاتف : ٠٢٢٤٤٠٥٠٤٧

موبايل : ٠١٢٩٢٥١٥٩٢ - ٠١٨٢٣٦٣٠٣٥

E – mail : dar\_oktob@gawab.com

المدير العام :

يحيى هاشم

تصميم الغلاف :

محمد الطلاوي

رقم الإيداع : ٢٠٠٨/٥٨٥٤

جميع الحقوق محفوظة ©

# المكان جُؤَاك مُحَاصِرٌ

شعر

محمد حسني إبراهيم

الطبعة الأولى

٢٠٠٨



دار الكتب للنشر والتوزيع



الإهداء

الى اصدقائي جميعا  
ليكم دموعي في الغياب  
ومحبتتي

محمد

الأسامي تفرحك يأنيد في  
حزنك

## نادي حافظ

عيون بتطل ع الشباك  
والسجن غربة تخنق الحواديت  
بالظبط زي التوهه ف الفوقان  
فـ تمد ايدك تزرع الحرف اللي ساقط ع  
الحدود  
وتربي دمعة ف وسط حبسك الانفرادي  
تكبر عليك .....  
وتعوم كأنك قشه تتمنى الغريق  
يوم الوصول...  
يتعلق ف طرف القش يسقط م النتيجة  
ترجع لأول سكة الرايحين  
رايح تخلي الدنيا بنت تفرحك  
ترسم حاجات ..  
على قد أول خطوه بس نروح

وتمني نفسك بالعطور  
الزينة ————— والبرواز  
رايح لقدرك  
بس نيلك عطش  
والخوف تكون رايح تسف الرمل  
أو ترمي ندرك ليه  
الخوف عليك أكثر هناك تستطعمه  
ترجع ما تعرفش الخضار  
غير العلامه الوسخه على وش الدولار  
رايح وقلبك وسطنا  
ف اركب برجلك سكة الرده  
أملا بقلك من حنين النيل  
تف ع الصحرا ف طريقك  
رايح تخلي الدنيا مره تبل ريقك  
ولا تبل حدودنا دمعة للفراق  
رايح نخلينا حزاننا بفرحتك  
طب رحت فين ....؟



## حادی

تقفل زراير القميص وتقول لنفسك  
كفايه عليك دخان السجاير  
وترفض أي حاجه تهيج تراب البيوت  
فترفض تكون جواك  
يمكن ساعتها تباصيلك  
نفس الإحساس بالفرق

## E\_mail

في أي وقت تفتح ال ايه ميل وتحط فيه أي

حاجه

ممکن تتصورها

وتخش على أي حد تنكسف من صورته

ف الجرنال

وتشوف بلاوي الناس فتهون عليك البلوى

وتتحمل ...

لكن إذا فتحت دماغك لأي حاجه على الشاشة

ممکن يدخلوك بسهولة

ويرموا عليك هدومهم

يتهيألك ساعتها ... إنك بتعريهم

## تفكّر

انت دلوقتي قاعد بتتفرج على حصار  
ياسر عرفات  
وضرب الحيطه اللي ستراه عن شعبه  
وتيجي صورته ف وسط الشمع وهو مجتمع  
مع وفد من أي بلد  
يستنكر شارون وسيرته  
بس هما بيتكلموا خواجاتي  
ف أكيد ها تحاول تستني الترجمة على الشاشة  
تنقل صورته الموت والدم ف الشوارع  
ودخان الكنيسه  
ساعتها بس ممكن تصدق  
أن واحد من اللي دخلوا خايفين من شوارع  
العرب ولع ف نفسه لأنه ما فهمش معنى  
" شعب الجبارين "

لأنها اتقالت  
وقت ما كانت وردية الموت بتستلم  
من بعض الجثث من غير اسامي

## الطلاوي

وقت اما تقعد معاه ترتاح  
فتسيب صورتك بعلها يمكن يلقط ملاحظها  
ويحط بعض رتوش خفيفه  
تبان ف عينه الحاله اللي أنت عاوزها  
لما بتمسك قرص الكيميا وتدور فيه  
فيلف على اصحابك ويسيبك تايه  
ترجع تلاقي واحد من اللي حدد وجوه الناس  
عايز وشه ... من أنابيب الأكسجين والدم  
والجلوكوز  
وتخاف تخش ف نفس الحاله تتوه  
من غير ما تعرف مره واحده  
إمى المرايا ها تعرف شكلك الثاني ....

## مجدى الجابرى

لما قرئت سطر بن من ربحته  
رجع معاك شريط المقابلات الخاصه  
وفرد العضلات  
كنت بتعمل حقاني وبتوزن صح  
وان كل كلامه ممكن تقوله  
مع محمد عبد المعطي ف الطريق  
لندوة محسن الخياط وكنت بتكلم علي طول  
وتقول أهو "نثر"  
لكن لما لقيت لحم ودم ف ورقك  
حسيت و قعدت بتقنع فيا بآنك صح  
لما قرئت سطر بن من ربحت

## نورها

تعرف العيال بيكيروا ...  
قالتها أمي وهي بتشاور على بياض  
شعري من السوالف  
وكأنها بتحاول تضحكني لما الكلمه  
سرحت ف دماغني  
فكت طرحتها خدتني من إيدي  
على أول شعر يطقطق  
لما ابتدينا ندخل عليها  
عيل ورا الثاني  
ونقول لها ماما

## يسري العزب

تفتح بمينك  
تلقى كل الكون يتسابق عليك  
فتضم فرحة بكره ذكرى للوجود  
وتسافر الاحلام بلادك  
تبتدي تعلم ولادك  
يكبروا  
يخونوا  
تلاقيهم ياهوذا بكل لون  
ترجع ما بين نفسك تلاقي حبه  
زي السراب ف العمر  
وتقول هأسيب الحزن ليهم  
تفتح بمينك  
تلقى كل الكون يتسابق عليك



## النيل

أنت اللي عارفينك وطن  
وصيرت لما كبرنا فيك  
علمتنا معنى السكن  
وزرعت فينا الخوف عليك  
دلوقتي جي همرنا زلزال  
وبتسحب السجاده من تحت القدم  
فلو سمحت تقول لنا  
هاتجيب مين؟  
تقاوي تشبه أصلنا  
واحنا ان لقينا ف وسطنا  
بذره ومن ريحة بطل  
نزرعها فين....؟

## محمد عبد المعطي

عمال بتقاوح بحر وحك  
وتراهن على بكره وع الناس  
وتطلع حوادث من قلبك  
بتحاول تنطق اساميههم  
تغلب فيهم  
فتقول رابش  
وتلف بصندوق البيكيا  
تنحسر على كل ما فاتك / نياتك خير  
لكن على باب البيت واقف  
الطير مستني مواربة باب  
ويخش ينقر اساطيرك  
تبتدي ترقيق على خلقه  
وتصدق كل ما تنفخ فيه ممكن ينطق  
يتحرك زي ما ها تقول له

على غفله يسيبك .... ويطير  
ترجع مع شكل ما لوش ريجه  
تبتدي تتكلم ————— مايردش  
فمفيش غير انك تتوضى  
تنوي صلاتك على كرهه الناس  
ما تغبش وحسك ف الدنيا  
أرمي طوبته  
خش نام

## سید حجاب

بابك سردابك احبابك  
يتسابقوا يخشوا ف قلبك  
فيلاقوا الجنة ومقاتنها  
وعشان انا من سكانها  
حطيت روعي ف مكانها  
وقعدت معاك ف حماك  
نتونس بيك في زمانك  
وتونسنا ف زمانا  
يا ابو قلب رقيق صفصافه  
ف الهوا طايره و هفهافه  
على كل حبايبك داري  
من ديتنا الخطافه

البت اللي ما ختتش منها نصيبي وعدت  
زي صباح الخير فترد عليها صباح النور  
وتروح وتسيب لك كل ما جابت  
تفتح صندوقها تشوف ف شوارها حاجات  
وحاجات  
كانت هاتخش عليك بابك وتعيش وترعرع  
جواك

براك دلوقتي الكون فاضي  
على قدك خليك متشوك  
تستاهل كل ما فايتالك  
الآشيه بعافيه وقلبك شاخ  
بتطل عليك من سمواتها  
عدت وخلّاص  
تصبح على خير

## تَبِكَ أُوِي

دقيقه حداد

وننسى كل ما قلناها

عن الحبسه وعن ضيقه مخاليقك

عشان غضبان على عبادك

سايهم لجل عبادك

وننسى العذرا والأقصى

ما دام لسه

بنرضى نبوح عن الأحزان ... وعن أوطان

ف سطر ف وسط افراحنا

تمللي ليه كده جراحنا؟

تكون تيك أوي

## میزد کول

كان الشجر ييحب بعض  
ويداري حكايات البنات  
يتقطع المنظر عليه  
والبت لسه ها تحفر الحرف الحقيقه للولد  
فتبان دموع الفرحه يتقاسموا الحنين  
الواد بيطلع زي جان  
على أول العتبه القديمه يفتكر  
كانت هناك المريله / بتحب شكله تفرحه  
تلعب معاه  
وتشيل كشاكيل المذاكره ف حصه الألعاب  
كانت ف حبه ورد مزروع ف الجنينه  
ويشوفها عز اللعب يثبت ف المكان  
عناقيد بتكبر تحضن العناقيد  
الشوك يخاصم كل إيد

لمست بشوق الميه للفوران  
ها تغني غنوه لكل شمس وكل طوق  
عامل على رقة حبيته أسوره  
ومزيناها للخروج و الحب  
مزد كول:  
خليك على الشجره  
يا حرفي مين قابله ...؟  
لا عرفت غيرك ونس  
ولا حب من قابله



## استغمايه

كل حاجه بتختفي  
تدارى ورا حاجه  
ملهاش علاقه بأي حاجه تعرفك  
سافر وخطاويك الحزينه هاتلاقيك  
وها يعرف المشوار بداية خضتك  
بتقول سنين ما هتعرفكش  
وانت اللي ملبوس بالوطن والأمكنه  
بعفار مدينه بتعرف الأغراب  
وتسلم الخوف للسكات وها تنتظر....  
فركيشه مش هالعب معاكوا  
من جديد

## عهدى شاكه

عصفور على المس الصغير  
نضربه  
ويدخل الفرحة علينا بالهروب  
تقابل الأصحاب  
وتتشبك ايديهم  
يعرفوا زمن الصغير ... والكبير  
شايلىن على اكتافهم ملامح للبيوت  
والنيل وحة من تراب الأهرامات  
شايلىن ما بينهم صبرهم  
نحتوا حكاوي بعزم ما فيهم  
على سطر الزمان  
نحتوا ف عز الليل طريق  
و ف عز عز الخوف  
بيتبادلوا الأمان بالتريقه

ويعرفوا  
ف الموت حياه وما بيعيشوش  
إلا الشويه .. المسروقين  
من زحمة العناوين  
ومن صخب الغياب  
يردهم .. عهدى وعوده لأصلهم  
ما يعرفوش بينهم أسامي  
ترجع عليهم دقة الساعة ودنيا  
سنديلا  
نلبس أسامينا ونتعلم نتوه

## أيمه بكة

دلوقت هاتدق الساعات وتفكر  
فاتت عليك وكأنا  
بتقول صباح الخير ومشيت قبل  
ماترد الصباح  
وهويدها هاتقولك أكيد  
ما تشيلش ف دماغك  
يخليك لينا وتعددي تاني عليك  
تصبح أو تمسي  
وتمشي دوغري  
مريم ها تفرح بالشموع  
دنيا هاتمسح ف ديل البنطلون  
وتبوسها يمكن تنبسط  
لكن تلف وترج الساعة  
تحييك من على سلام حياتك بالشقا

تفتكر وقرز فيها  
أو تحذفها بفكره من دماغك  
تسقط عليك  
أيام ما تتقابل وعينا تشد بعض  
وساعات من الحقد اللي جوه عنين بتاكل  
جوه قلبك عيش و ملح  
لحظات قليله م الحياه  
بينك وبين سطر الحقيقه والوجود  
ترجع لتورته شموعها قايده ف جتتك  
من طرد أحلامك ف بكره يكون لنا  
أو كان لنا  
بتفوق وتشرب لجل ما تعيش اللي كان  
الشيخ ياسين  
أو دير ياسين  
سورة ياسين  
حركات تعذب فيك وتشرب ...تفتكر  
تتعذب أكثر لما بتقرب عليك  
وتقولها  
ها سرح ف مين ؟ غير العيال

## كالعادة

تضطرب تبين معرفتك  
وهاتلبس وش العارفين  
ترمي الأفكار ... على طول دراعك  
وكأنك شبع من هنا أو خلصت منك على غفلة  
هاينط خيالك ويحاربك  
إزاي بتعمل إشغال دماغ ؟  
وتخالف قوانين حوادثنا بتعصي الناس  
وبتاكل ف كلامك ... نارهم  
بتشوف زي  
باستطعم بكفوفي صورهم  
وتخس تخانق جوايا  
تخلق هتافات....  
تكبر ف دماغك ما تنامش  
إلا ما تحاول تقراها

مين فينا ها يعرف آخرتها ؟  
راح تصرخ فيك الخيالات  
وترجع ليك مليون صوره  
تشبه أفكارك  
كالعاده  
تعب ... مع نفسك  
فتنام  
يرضك حافي .....

تستلف شكلي  
وأحوالي وظروفي،  
أستلف  
حتى البطاقة والاسامي والصحاب  
حواديت هاتنقسم ما بينا  
كل يوم  
نخذ راحتك  
عايز كمان اللون  
وحكاوي .... مرت واستوت  
وحكاوي مرينا عليها من سكات  
عايز تاريخ  
هاديك وجع  
اول ما دقت دمعي  
وضحكت : لأ بكيت



عايز تسميني باسمك

واندهك

هي دي

لحظة حياتي ..

لو قبلت ف يوم

راح أسلفك

د

م

ي

## قصاید

## مشاهد من فيلم بجد

( ١ )

على خط الحدود  
هتروح هناك ويلبسوك كاكى ( الزى الرسمى  
للجيش اللي  
عبر في ٦ أكتوبر )  
وتستلم سلاح من غير ذخيرة  
وتقف فارد صدرك باصص لفوق  
أنت دلوقتى فرد مهم في ( ..... )  
حط بنفسك اى جملة تعجبك  
وحاول تعيش الحلم  
حد  
اتنين  
ع الخط التاني نفس العرض السينمائي

واحد لابس أغمق سنة فارد صدره  
وف إيده سلاح بذخيرة  
وعارف أنه فرد مهم على الإطلاق  
بمناسبة الإطلاق  
تنطلق منه الرصاصة ثموتك  
وكانك حمامه أو غراب  
وأول ما كتبنا كلمة إطلاق ..... أفكر  
عاش مع نفسه شوية  
رجع لأصله  
أتغاي عليك وقتلنا

( ٢ )

عشان تعيش  
تاخذ نفس يدخل معاه كل اللي بره ويحتويك  
وبيتملى صدرك بالوطن  
مش مهم عفار الطريق ولا حتى ريحة الموت  
المهم أنك تعيش  
تاخذ نفس وتشم ريحتك ف الشياط

( ٣ )

ارفع صوتك وبعز ما فيك أبتدى

تحيا .....

المواطنة بتاع زمان

وتعيش علينا رغم موتها ونحترمها من سكات

أهتف بصوت على

وهل يخفى القمر ..... ؟

بس الأمر الصوت بيطلع عكس صوتك أو

بيدبلج على الصورة أنتصارهم ----- مش

عليك

( ٤ )

الموت على رقاب البشر رهوان

يزهق فيرتاح ع الجثث

## العوض على الله

يمشى بطل القصة الحقيقية  
وهو متأكد أن في حاجة بتدفعه لقدام  
ويعدى كل البوابات  
من أيام ما أتعملت ف مصر القديمة  
ومن سعتها ما أتجددش فيها ولا باب  
وبقى أى حد  
يدخل من أى باب وف أى وقت  
ويمكن كمان يعمل السكة إياسة  
من غير ما ينتصر يدخل من باب النصر  
ومن غير ما يفتح ولو نفسة للحياة  
يعدى من باب الفتوح  
و أدى بيبانك يا قديمة  
نسيوها ف المدينة  
ماشى بيدندن على نفس اللحن  
ويص لكل باب ويستعجب

انت تبعه ميه...؟

-۱

مضطرب اسيب اسراری ف طابلون العریه  
وارجع لها کل ما احاول ارواح لای مشوار  
العیال سافروا وفيهم الی مش هاشوفه تانی  
اخیی سری مع مین.....؟  
سؤال دایما یفاجئنی کل ما تعرض لصورتی ف  
ای مرایه او قزاز عربیة مفیم  
وأتخسر ع الفیلم الی عدی من قصة حیاتی  
....وشفته عشته بس ما قدرتش "أسیف"  
ای مشهد منها علی کارت میموری  
واشوفه وقت مانا عایز وما یفترضش علیا  
لما اعدی ف شارع او أقول  
قصیده او حتی اضحک مع مراتی

فتحش المشاهد وتنهش فيا من غير ماتحتشي مني  
وتخاويني

مافتكرش بعد ماقلت يافكيك اني هاقدر  
احصلك او حتى احصل افكارى اللي ابتدت  
تمشي فكره ورا فكره  
ومايتخانقوش مع بعض زى زمان

-٢-

(راحوا الحبايب بقالمهم عام والثاني )  
يحص للتسجيل ويتخيل ان حد بيواسيه على  
اصحابه اللي خلعوا منه واحد ورا الثاني من غير  
ماحد فيهم يقول له ماشي  
مع انه كان بيتخيل نفسه قوى جدا من غير اي  
حاجه معاه  
يقدر يتخلا عن معاد مع اى واحد فيهم ويقعد  
يقرا ويطلع اى حجه من دماغه ولأى حد  
ولما عرف انه مش هايقدر يخلف معاد تاني معاه  
سرح ف كلمة " راحوا " بس وساب بقية  
الاغنيه من غير ماياخذ باله  
وعله غفله تنزل الدمعه اللي محبوسه ف عنيه



يقف ف نص الشارع  
ويقول له فين الرخص وازای بتخش مخالف ف  
طريق عام  
مايعرفش يرد عليه خالص  
ويقول له " انت تبع مين"

## حلقان من الخوف والشجوه

### ١- مشهد ممكن يكون واقعي

بترجع لنفس المكان وتعمل انك ناسي  
حاجه

علشان تشوف اخر حته من الذكريات  
وتحاول تمسكها بايدك

فترفض وبشده انها تدخل معاك ولو  
بمجرد

حوار صامت

وتطلع لسانه ليك وتغيظك

وترمي لك من غير ماتحس حاجه  
تخليك

تعلق اكثر واكثر

بالمكان

والناس

وكل مره تحاول تستفرها علشان تطلع  
لك لسانها  
تاني ٠٠٠٠ وتاني

## ٢- عارف ولا بتستعبط

مشيت من غير ماتعدى على المرايا  
وتشوف اخر مكياج معمولك  
لمواجهة نفسك والناس  
وافترضت ان اخر صوره اتلقطلك  
لسه  
زى ماهى  
الوش اللي بيضحك ع الفاضى والمليان  
ومارضتش تفكر ف اى عنصر تاني  
ممکن  
يلعب دوره ويغير ملامحك  
ولا اهتميت باضائه

ولا بالملابس  
قلت ف نفسك  
ممکن بالفوتو شوب اغیر اللى انا  
عاوزه  
وممكن كمان  
سرح  
دخل ف صراع مع نفس الصوره  
بتاعته  
وحاول يعرف  
فين الاصل ؟

### ٣- کلاکیت آخر مره

فی المونتاج بقدر یشیل اى مشهد  
ویمط  
غیره  
ویجب اللى المخرج عایزه بالظبط

يموت ده علشان التطور الدرامى  
ومش بعيد يعمل موسيقى تصويريه  
للموت  
ويسيك وانت بتتفرج ترجع مشهد اى  
حد عزيز عليك وتفتكر يوم موته  
بس الاكيد ان دموعك بتزل غصب  
عنك  
مش علشان تدخل ف المشهد ويبقى  
تطور  
درامى  
أومشهد واقعى وتعيشه بجد

#### ٤- البدايه

تزل اسامى الممثلين كلهم  
حسب الاقداميه والنجوميه واعتبارات  
تانيه  
كثير

وتستني تشوف اسمك

ولوف كشوف العايشين

تصير نفسك جي

جي

جي

وأول ماتطلع من الصورة يتزل اسمك

واحد واقف وبكل اهتمام باصص على

البرواز

وحروف بتبان من وشه

جي

جي

سبحانه من انزل ملايكه  
تخطفك للجنة حدف

-١

لما تتفرج على سيناريو الحدوته وتعرف  
كويس ان فيه  
حاجه مش مفهومه  
لا للمخرج ولا للبطل ولا حتى  
للجمهور تعرف انك  
قدام سيناريو مش سهل حد يقلده  
اويكتبه وتعرف كمان ان الحكه بتاع  
الحكايه  
خارجة عن ارادتك متملكش تفتح بقلك  
وتشاور بهزيان ولونطقك بحرف واحد  
بسرعه  
تنساه وتستعجب

تسيب نفسك لعبارة  
بتيحي على الخاطر  
وتقولها بجد  
تدابير الله

٢-

نفس المشهد اللي انت فيه ومعك اصحابك  
بيأنسوك أو بيكملوا فرحتهم بيك بتقص  
وتعمل مونتاج وتطلع نفسك بغاوة مش  
متعودين عليها  
منك لان كل اللي كان معك  
عارف قد ايه بتحاول تضحك رغم الجرح  
ورغم حاجات  
متفسرهاش غير نادر للي  
معك ،  
ازاي بتطاوعك ادوات المونتاج وتشيل من  
بينهم صورتك  
وانت اللي كتبت الحدوته



-٣-

لبت الى وصفتها هلدوء وماسبتش  
منها ولا حته  
هاتسيها لمن ؟

-٤-

صندوق روبايكيا بيتقطع ويتمرغ ف تراب  
الارض  
علشان ماشفكش بتفرز فيه

-٥-

حاسبي ياريج ريجه  
ف غناكي تباريجه  
مين اللي كان ريجه  
ساعة قضاء الله

-٦-

شفت  
فضلت تحب فيك الناس وماتقولهمش ولا  
كلمة فيها شبهة

زعل وبتحسسهم  
إنك حنّين حتى ع الارض اللي بتخطيها  
وفضلت كده صابر وبتشر الحنين وف لحظة  
كرسى ف الكلوب  
وتظهر الصوره الحقيقه  
جبت من فين القساوة  
انت مش بتحبنا..... بتسيينا ليه؟

-٧-

زيك زيهم هارن عليك واستنى تردد الرنه  
صباعى  
هايسبق ويحاول يفتح كالعاده  
نتسابق مين يقدر يفتح على مين ؟  
رنيت  
مستنى تردد الرنه ..... ترن  
مستنى  
رن ومش هافتح بس ترن

-٨-

يرحمنا من غيبتك بقى

سنه ٤٣ سنه

وبالتحديد ١٢/٣١/١٩٦٤م

فيه حاجه غريبه حصلت بين أبويا و امي و شلت  
أنا مسئوليتها  
يمكن كانت الدنيا برد شويه والغطا كان يدوب  
على انقد  
حاولوا بطريقتهم المعتادة أنهم يدفوا  
ومارضيوش يخلوها حلوه  
كل سنه العبارة دى بتهدف على دماغى واقعد  
لوحدى أتحمل يوم بعد يوم  
ضلي الى كان يرافقني دائما بالنهار ويسيني عز  
الليل من الخوف  
عندي الشجاعة اكرهه  
واعشق سكوتي  
عز موتى لما بتغيب الصور لوف المنام

اعتقد ان دى بداية موقفه إلى حد ما لمواجهة  
سنه جديدة بحلوها وقرفها  
واعتقد برضه أن الناس مش فاهمه الحدوتة صح  
لان ف كل مره بيفكروني ان كبرت ولازم  
أتحمل اكثر واكثر  
وان الضحك لابد يكون له سبب وتعمله  
١٠٠٠ حساب

لازم تعقل وتفكر ف كل صغره وكبيره  
وتكمل كل حاجه وقعتها منك الأيام  
سواء كان لعب أو لعب  
والدنيا بالنسبة لك كام نتيجة بتفرها بأيديك  
ومالكش حرية الحركة فيها بمزاجك  
سيبها كده ولحد ماتخلص عديها  
ولحد يوم / /  
العلم عند الله

## شباب وده حقلك تعيش

بعد أما تخلص من الجامعه ومن الأحلام اللي زى  
قلتها

لان بالتاكيد مفيش حاجه منها هتتحقق

حتى لو جيت امتياز

هاتقعد جنب اصحابك وتفتكر معاهم وتضحك

وتشوف ابوك بيحاسبك على حاجه مالكش

فيها ذنب

لا انت اللي لاقى شغل

ولانت اللي عايز تنحرف وماتوريلوش وشك

وتقعد قدامه ف الرايحه والجايه

يرجع ف يوم ممكن اسيبك تحسده وتحدد

ملايسات الحديث كمان

هل هو قاصد ولا قاصد

قبل مايتكلم يرميلك حنة شيكولاته من بتاع  
ايطاليا

شوف عاملين شيكولاته بيعضا كمان

تقرب منها على استحياء

وتقطع حنة صغيره وماتسيبهاش من بقك

يبتدى يرميلك احلامه

ويقولك رروح

بيع البيت ويخلي اخواتك مايكملوش تعليمهم

عشان يوفر المصاريف

و تبتدى من غير ماتحس تطاوعه

ترهن كل اللي انت عايزه بالسفر

وتتمحك فيه

تطلع البسبور

وتدفع الفلوس اللي انت وابوك عارفين جبتها

ازاي

تركب وتسافر لحدود ليبيا

وتستلم منهم وف البحر طوق نجاة

وتعزل ف عز القهر  
ماسك ف ايدك جواز سفر والايام الجايه  
وحته شيكولاته خبيتها من اخواتك لما اتكاتلوا  
عليك ساعتها  
مايستحملكش الطوق ولا البحر  
ويحاولوا يطلعوك مايتعرفوش عليك الا بمحبة  
الشيكولاته البيضاء

## حلم ولا حلم

عائزك تخلى بالك وتعمل فرق بين الحقيقه  
والخيال

او بين الواقع والخيال  
عشان مش ف كل مره اخلى حد يقرصني  
وافوق

واخسر بعد دا كله نفسي  
الكلام ده افكرته لما نظيت قدامي ومساعملتش  
حساب للمفاجأ واللى ممكن تسببه لواحد زى  
عامل انه مايبخافش خالص

واى صوت صغير بالليل ممكن مايعرفش بنام  
عشان مانتهدش عن بعض ف الكلام  
انت اللى رميت نفسك قدامي وسألتك ساعته  
سؤال مباشر  
انت مش مت ٠٠٠؟



رديت وبكل ثقة انا باشوفكم هاتعملوا إيه من  
ورايا  
طبعاً فضلت اضرب فيك واشتمك بامك وابوك  
وانت بتضحك  
خدتك وجريت ع القهوة وقصر الثقافه وباقصي  
مجهود اقنعتهم انك لسه حي  
بقى اللى يضحك واللى يستغرب واول ما  
ظهرت عليهم فجأه  
ماقطعوش ايديهم ولا حاجه واتقلبت هيصه  
اللى يضربك  
والى يشدك من هدومك  
واللى اتلموا على بعض  
المهم انك بتضحك كالعاده ومش عايز تحبيه لير  
وانا باعيط من شدة القرصه

## الملك جواك محاصر

خلاص هاعتيرك وافقت طالما مش راضى تتكلم  
وهانزل معاك من يوم وعيت ع الدنيا وحاسس  
ان فيه حد مراقبني زى

ضلي

او بمعنى ادق شويه حد متسلط عليا  
ماليش دعوه برضه هاعمل اللي انسا هاعمله  
بالظبط.

مهما تعمل مؤمرات عشان تحاول تصلح غلطه  
او تساعدني ف عمل حاجه بتعجبك  
شوف هو اللي ف دماغى ف دماغى  
وان كنت مصمم

شوف ويس

لاى لو قدرت امنحك من الشوف كمان كنت  
عملتها

وانت كل اللي عليك تتعلم تبقى زى وماتديش  
لنفسك ولا فرصه وحده للتعبير عن رأيك  
متفقين

ولا اقعد ف بيتنا وماخلكش تشوف اى حاجه  
وتسلى نفسك بدل الحايصة الكدابيه دى  
السكه بتقبل اى حد مالوش مأوى وتخليه علامه  
ليها كمان

مش مجالنا دلوقت ف الكلام عن حرية التعبير  
ولا التفكير كمان  
خلى بالك

دى الارض بتحضن خطاوى اللى عايشينها  
وعارفاهم

وتديهم وماتخدش منهم غير فياضة عمرهم  
والزمن حدوته هانعيشها وكل واحد له الحق  
يحكيها زى الورق  
المكتوب له تمام

## الفهرس

### الأسامى تفركك ياتزىد فى حزنك

٧	نادى حافظ
٩	عادى
١٠	E_mail
١١	تفتكر
١٣	الطلاوى
١٤	مجدى ا لجا برى
١٥	نورهان
١٦	يسرى العزب
١٧	النيل
١٨	محمد عبد المعطى
٢٠	سید حجاب

٢١	ندی
٢٢	تيك أوي
٢٣	میزد کول
٢٥	استغمايه
٢٦	عهدي شاکر
٢٨	أيمن بکر
٣٠	کالعهاده
٣٢	محمد حسني

### قصايد

٣٥	مشاهد من فيلم بجد
٣٨	العوض على الله
٣٩	انت تبع مين...؟
٤٢	حلقات من الخوف والشجن

٤٧	سبحانه من انزل ملايكه تخطفك للجنة حدف
٥١	من ٤٣ سنه
٥٣	شاب ومن حقله تعيش
٥٦	حلم ولا علم
٥٨	المكان جواك محاصر

## الشاعر

عضو اتحاد كتّاب مصر  
نشرت قصائده في العديد من المجلات والجرائد  
الأدبية  
قدمت له حلقات المسحراتي بالقناة السابعة

## صدر له

مواسم للعطش والجوع أصوات أدبيه ١٩٩٥م  
أول خطاوى العشق موت طبعه خاصة ١٩٩٨م  
عرايس النيل النشر الأقليمي ٢٠٠٠م

## تحت الطبع

مسرحية صندوق الدنيا

